

- मुख्यमंत्री भजनलाल शर्मा कह्यो—वां रा राज रा दो साल सुशासन अर विकास ने समर्पित रह्यो ।
- प्रधानमंत्री नरेन्द्र मोदी रो तीन देशां री यात्रा रा पहला दौर मांय जॉर्डन री राजधानी अमान पूगण परां ज़ोरदार स्वागत ।
- देश मांय लारला ग्यारह साल मांय सूरज री रोशनी ऊं बिजली बणावण रा मामला मांय 46 फीसदी री बधोतरी ।
- विधानसभा अध्यक्ष वासुदेव देवनानी नौजवानां ऊं बदलता भारत री दिशा मांय नुवा आयाम बणावण बाबत् कह्यो ।

000

मुख्यमंत्री भजनलाल शर्मा कह्यो है के वां री सरकार रो 2 साल रो कामकाज सुशासन अर विकास ने समर्पित रह्यो है। वे आज जयपुर रा आर यू एच एस अस्पताल मांय राखी ज्या स्वास्थ्य शिविरां रा राज्य स्तर रा उद्घाटन जळसा मांय बोल रह्यो हा। श्री शर्मा कह्यो के वां री सरकार लारला दो साल मांय हर तबका सारु काम कीनो है अर खुशहाल प्रदेश बणावण बाबत् केई जतन कीना है। वे कह्यो के सरकार नौजवानां, महिलावां, किसानां अर मजदूरां माथे खास ध्यान दे रही है। श्री शर्मा कह्यो के लगभग हर मोर्चा माथे वां रा राज रा 2 साल मांय ही लारली सरकार रा 5 साल री तुलना मांय बत्तो काम व्ह्यो है। मुख्यमंत्री ई मुद्दा माथे विपक्ष ने विधानसभा मांय अर बाहर खुली चर्चा री चुनौती दीनी।

मुख्यमंत्री कह्यो के प्रदेश मांय स्वास्थ्य सुबीतां ने बेहतर बणावण अर स्वास्थ्य रो बुनियारी ढांचो विकसित करण सारु लगातार जतन कर्यो जा रह्यो है। श्री शर्मा कह्यो के सरकार राज्य मांय स्वास्थ्य सुबीतां ने वां लेवल ताई ले जावणो तैय कीनो है, जठे परदेशी लोग ई ईलाज सारु राज्य मांय आवण लागेला।

ई मौके मुख्यमंत्री केई कार्यक्रमां अर योजनावां री सरुआत कीनी। प्रदेश री मौजूदा सरकार रो दो साल रो कार्यकाल पूरो व्हेवण रे मौके ज़िलां मांय आरोग्य शिविर लगायी ज्या। पाली, सवाईमाधोपुर अर डूंगरपुर समेत न्यारा-न्यारा ज़िलां रा ज़िला अर उपजिला अस्पतालां अर न्यारा-न्यारा स्वास्थ्य केंद्रां माथे ईलाज रा खास शिविर लगायी ज्या। आं शिविरां मांय 30 साल ऊं बत्ती उम्र रा लोगां री बी.पी., शुगर, बी.एम.आई. अर कॉमन कैंसर री मुफ्त जाँच करी ज्यी। टी.बी. मुक्त भारत अभियान रा तैत टी.बी. रा लक्षणों री जाँच, आस वाळी लुगाइयां री जापा ऊं पैली री जाँचां करीजी अर बच्चां रे टीका लगायी ज्या। पाली, हनुमानगढ़, डूंगरपुर अर सीमलवाड़ा समेत केई ठौड़ां खूनदान शिविर ई लगायी ज्या। मुख्यमंत्री भजनलाल शर्मा ई आज केई कार्यक्रमां मांय शामिल व्ह्यो। आज मुख्यमंत्री रो जन्मदिन ई है। ई मौके वे जयपुर री पिंजरापोल गौशाला मांय गायां री पूजा-अर्चना अर गौ सेवा कीनी। मुख्यमंत्री आज डीग ज़िला रा पूंछरी का लौठा रा श्रीनाथ जी मंदिर मांय दर्शन कर र पूजा-अर्चना कीनी। वे प्रदेश री लगातार बरकत, खुशहाली अर जनता री जिन्दगी मांय सुख-समृद्धि री कामना कीनी।

मुख्यमंत्री मंदिर परिसर मांय मौजूद जातरुआं सागे ई मुलाकात कीनी। आज सिंज्या श्री शर्मा जयपुर रा जवाहर कला केंद्र मांय राज्य स्तर री विकास प्रदर्शनी रो उद्घाटन कीनो। प्रदर्शनी मांय लारला दो साल मांय न्यारा-न्यारा महकमां री उपलब्धियां रो दरसाव करी ज्यो है। राज्य री मौजूदा सरकार री दूजी वर्षगांठ रे मौके आखा राज्य मांय **नव उत्थान-नई पहचान, बढ़ता राजस्थान-हमारा राजस्थान**, मुद्दा माथे कार्यक्रम राख्या जा रह्यो है। प्रदेश मांय काल शहरी समस्या समाधान शिविर सरु कर्यो जावेला। 24 दिसम्बर ताई लगाया जावण वाळा आं शिविरां मांय शहरी जनता री समस्यावां रा बेगा अर असरदार निपटारा री कोशिश करी जावेला। नगरीय विकास अर आवासन विभाग रा प्रमुख शासन सचिव देवाशीष पृष्टि बतायो के अ शिविर हर नगरीय निकाय अर प्राधिकरण मांय लगाया जावेला। वे बतायो के आं शिविरां मांय चाल रह्यो मामलां सागे नुवा मामलां रो ई मौके ई निपटारो करण री कोशिश करी जावेला।

प्रधानमंत्री नरेंद्र मोदी तीन देशों रा सरकारी दौरा रा पहला दौर रा तैत जॉर्डन री राजधानी अमान पूग ग्या है। जॉर्डन रा प्रधानमंत्री डॉ. जाफर हसन वां रो स्वागत कीनो। सोशल मीडिया माथे करी ज्या एक पोस्ट मांय प्रधानमंत्री मोदी गर्मजोशी भर्या स्वागत सारु जॉर्डन रा प्रधानमंत्री रो आभार जतायो। किंग अब्दुल्ला द्वितीय बिन अल हुसैन रा न्यौता पाछे प्रधानमंत्री मोदी 37 साल पाछे जॉर्डन रो दौरा कर रह्या है।

000

देश मांय लारला 11 साल मांय सूरज री रोशनी ऊं बिजली बणावण मांय 46 फीसदी री बधोतरी व्ही है। केन्द्रीय वाणिज्य अर उद्योग मंत्री पीयूष गोयल आज नई दिल्ली मांय खबरनवीसां ने आ जाणकारी दीनी। वे बतायो के भारत अब दुनिया मांय कोयला रो चौथो मोटो शोधन केन्द्र है। श्री गोयल कह्यो के हवा ऊं बिजली बणावण रो बूतो ई बध र 53 गीगावाट व्हे ग्यो है। केन्द्रीय मंत्री कह्यो के साल 2014 ऊं सरकार केवल नतीजां माथे ध्यान दीनो है अर लारला 11 साल मांय ऊर्जा हलका मांय मोटा बदलाव व्हा है।

000

विधानसभा अध्यक्ष वासुदेव देवनानी नौजवानां ऊं वां री सोच ने मजबूती ऊं पेश करण अर समस्यावां रा हल बतावण बाबत् कह्यो है। श्री देवनानी आज विधानसभा मांय राज्य री सरकारी स्कूलां रा विद्यार्थियां री एक दिन री युवा संसद मांय बोल रह्या हा। वे कह्यो के विधानसभा कानून बणावण सागे नौजवानां ने मुख्य धारा मांय लावण रो मजबूत मंच ई है। देवनानी कह्यो के जीवन कौशल, वित्तीय साक्षरता अर नैतिक मूल्य सरीखा गुण विकसित करण री सामाजिक अर राष्ट्रीय जिम्मेदारी है। ई मौके शिक्षा मंत्री मदन दिलावर कह्यो के नौजवान देश रा आवता बगत रा नेता है अर वां ने तालमेल सागे लोकतन्त्र ने मजबूत बणावण मांय भागीदारी निभावणी चाहिजे। युवा संसद मांय 41 जिलां री सरकारी स्कूलां रा 9वीं ऊं 12वीं ताई रा 164 विद्यार्थी भाग लीना।

000

राजसमन्द रा पीएम श्री महात्मा गांधी विद्यालय मांय आज जिला स्तर रो युवा महोत्सव राखी ज्यो, जिण मांय करीब 700 विद्यार्थी भाग लीनो। इण मांय समूह नृत्य, एकल गायन, भित्ति चित्र अर कहानी सरीखी होडां राखी ज्यी।

000

पोष महीना मांय ई प्रदेश मांय घणखर ठौडां जोरदार ठारी नी पड़ रही है। राज्य रा घणखर हलकां मांय कम-ती-कम तापमान सामान्य ऊं 2 ऊं 4 डिग्री सेल्सियस बत्तो दर्ज कर्यो जा रह्यो है। लारला चौबीस घंटां मांय सब ऊं कम 5 दशमलव 3 डिग्री सेल्सियस तापमान फतेहपुर मांय दर्ज करी ज्यो। नागौर मांय 5 दशमलव 9 डिग्री सेल्सियस तापमान दर्ज करी ज्यो। फलौदी मांय रात री बगत पारो 14 डिग्री सेल्सियस ऊं ऊंचो रह्यो जदके केई दूजी ठौडां तापमान 8 ऊं दस डिग्री सेल्सियस बीचे रिकॉर्ड करी ज्यो। मौसम विज्ञान केंद्र जयपुर रा हिमांशु शर्मा आकाशवाणी ने बतायो के आवता दिनां तापमान मांय कोई खास बदलाव रा आसार नी है।

000

राज्य मांय अब धुंअर रो असर निजर आवण लाग्यो है। ई कारण व्हा न्यारा-न्यारा हादसां मांय एक जणा री मौत व्हे ग्यी अर केई लोग ज़ख्मी व्हे ग्या। भरतपुर रा उच्चैन मांय आज संवारे घणी धुंअर रे कारण अणजाण गाड़ी कानी ऊं ऑटो रिक्षा ने टक्कर मार देवण ऊं एक जणा री मौत व्हे ग्यी अर दो जणा ज़ख्मी व्हे ग्या। जैसलमेर जिला मांय बाड़मेर रोड रा जोधा गाँव कने धुंअर रे कारण स्कूल बस अर दूजी गाड़ी री आमी-सामी री टक्कर मांय तीन विद्यार्थियां समेत 12 जणा ज़ख्मी व्हे ग्या। घणा जख्मी पांच जणां ने जोधपुर रेफर करी ज्या है। भीलवाड़ा जिला मांय माण्डल कने करेड़ा रा गेला माथे मोटरसाइकिल सवार ने बचावण री कोशिश मांय एक बस पलट जावण ऊं 25 जणां जख्मी व्हे ग्या।

000

करौली रा किसानां ने खेती-बाड़ी री नुवी तकनीक री जाणकारी देवण सारु आत्मा योजना रा तैत 50 प्रगतिशील किसानां रो दल दूजा राज्यां रा पाँच दिन रा दौरा सारु रवाना व्ह्यो। उपनिदेशक कृषि अर आत्मा योजना रा पदेन परियोजना निदेशक धर्म सिंह मीना बतायो के ओ दल 19 दिसम्बर ताई दौरा करेला। ई दौरान, किसान केई नामी कृषि अनुसंधान संस्थानां अर कृषि विज्ञान केंद्रां रो दौरा करेला।

000

चूरु जिला रा तालछापर मांय पर्यावरण संरक्षण सम्मान समारोह राखी ज्यो। इण मांय जिला कलेक्टर अभिषेक सुराणा पर्यावरण बचावण रा हलका मांय ध्यानजोग काम करण वाळां रो मान कीनो। ई मौके वे कह्यो के कुदरत ने बचावण री म्हाणी नैतिक जिम्मेदारी है।

सूक्ष्म, लघु अरु मध्यम उद्यम मंत्रालय रा उद्यम पोर्टल माथे नाम मंडावण वाळा कारोबारियां री तादाद सात करोड़ ऊं बत्ती व्हे गयी है। इण ऊं देश मांय करीब 31 करोड़ लोगां ने काम मिल्यो है। एमएसएमई मंत्री जीतन राम मांझी आज राज्यसभा मांय एक सवाल रा जवाब मांय आ जाणकारी दीनी। वे बतायो के ओ पोर्टल साल 2020 मांय सरु करी ज्यो हो। नान्हा कारोबार सरु करण सारु मंत्रालय री ओर ऊं एक करोड़ ऊं बत्ता लोगां ने कर्ज दिया ज्यो है। वे बतायो के विश्वकर्मा योजना ऊं 12 लाख शिल्पकारां ने फायदो मिल्यो है अर सरकार साल 2028 रा आखिर तांई ई योजना रा तैत 30 लाख शिल्पकार पिरवारां ने इण रो फायदो पूगावणो तैय कीनो है।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय 28 दिसम्बर दीतवार ने विचार बतावेला। आ ई कार्यक्रम री 129वीं कड़ी व्हेला। ई सारु आप ई मुफ्त नम्बर 1800-11-7800 माथे राय दे सको हो। ई सागे ई नरेन्द्र मोदी एप अर माय जीओवी ओपन फोरम रे जरिये ई 26 दिसम्बर तांई विचार भेज्या जा सके है।

000